

四庫全書

集部

欽定四庫全書

少室山房集卷二十三

明 胡應麟 撰

七言古詩一十一首

嵩山歌 有序

去余家五十里而近有山曰嵩穹窿翠嶺峭蒨  
幽邃視洛之嵩高不知孰為伯仲也旁一峰千  
仞秀出巖嶮雲際若軒轅浮丘所嘗居者余因

以嵩之少室名之且為作長歌以紀其勝異  
日者採三花攜玉女歸將結茅於茲老焉

君不見嵩高之山高高出天半萬古扶輿結蔥蒨孤標  
突兀迴日星秀出蒼茫界河漢恍疑帝遣夸娥負中岳  
擲向東南鎮磅礴又疑巨靈一夜排風雷空中掣此青  
崔嵬仰觀宇宙豁俯瞰滄溟開天傾錦繡壁地湧金銀  
臺飛鳥不敢度猿猱為之摧層巒疊嶂何奇哉倒影下  
墜扶桑隈會稽秦望相去但咫尺赤城天目左右羅列

如浮埃絕壑迤邐飛梁縈洞空青水碧劃然蓬萊天仙  
跨鸞鵠時時下九垓遙峯挿天更奇絕天柱差我象緯  
列云是高高列峯三十六其一飛來墮吳越參差太華  
十丈蓮重疊娥眉萬年雪雲中之君紛紛拾瑤草散髮  
長歌弄明月朝來忽見黃帝車方明前導昌寓趨七聖  
盡迷襄城轍却望天壇尋故廬頃刻笙歌起岩際白鶴  
凌空舞瑤砌乃是緱山王子喬金支翠旗朝玉帝真人  
一去不復還玉書靈笈埋空山俗流徃徃輕飛仙不見

此後三十年少室山人結廬長嘯卧其巔峰頭一室但  
盈丈大易黃庭坐相傍紫芝空谷紛葳蕤真氣關門浩  
排蕩朝飧玉池露夜濯金屑泉明霞翼我體白雲怡我  
顏山靈候余戶跂息不得眠一行卧此三十載上元夫  
人時往還俯視城郭真囂煩縞衣素氅何翩翩乘風幾  
欲凌蒼烟胡爲羽駕尚躑躅惆悵孤峯夕陽落仰天大  
咲寒風生徙倚青藜望名岳無乃未踐三花諾寄言廣  
成子浮丘公吾將跨白鹿騎蒼龍訪爾三十六峯中橫

絕具次凌空同歸來却卧此峯上千年一視輕鴻濛

金華山三洞歌三洞曰朝真水壺雙龍是黃初

平昇仙處

薄遊金華山信足支短筇長嘯黃初平蹴踏金芙蓉芙蓉峰頭白雲起天風習習兩腋舉相傳古來洞天三十六乃是赤松真人之所理千岩拔崔嵬萬壑亘迤邐高欲凌空同側若摧鳥鼠括蒼與台雁瑣細不足擬帝鴻既長逝雨師邈難招迴看昔日講堂洞却憶當時劉孝

標九龍蜿蜒讀書處穹岩怪石摩蒼霄荒墳突兀葬彩  
筆至今詞客何寥寥講堂信鬱紆朝真益弘敞天門劃  
然開石洞豁榛莽恍然坐我金銀臺崑丘玄圃恣來往  
青虬赤鯉盡羅列三仙七聖時俯仰幽懷轉軼蕩勝槩  
杳莫窮飛梁百尺下窈窕舉足却墮冰壺中冰壺跨山  
腹氣勢何其雄何年虎豹穴置此蛟龍宮水簾參差直  
下五千尺銀河宛轉倒瀉雙白虹天孫雲錦織璀璨鮫  
人珠箔垂玲瓏飛流濺沫日夜不得息驚濤湧雪六月

迷長空聳身出水壺倚杖息餘峭舉頭萬松巔隱隱落  
斜照石羊紛紛望不窮突見雙龍挂寒嶠恍惚初平兄  
弟騎蛻骨遺此青天貌俯窺曲澗僅容膝解衣燃燭渡  
深黑行行不盡一線明萬乳熒煌噴蒼壁玉樹羅青葱  
芝田爛金碧誰持巨靈斧鑿此靈仙窟真人渺何許瑤  
草紛可拾枰間數子勢飛動細看尚記當年奕人言此  
穴穿四明天牕萬疊開蓬瀛摩挲仰視衆仙錄隱見若  
有胡生名吁嗟我今胡為在下土青鞋布襪落如流



萍迺思昔日玉皇側看花醉卧芙蓉城木公徘徊向我  
怒授簡謫余離太清一落人間五千載滄溟浩劫會已  
盈顧瞻靈境但咫尺奮身欲飛還不能倚杖還悲歌壯  
心浩難遏却憶雲門期瓢笠候明發迴望金華山茲遊  
信奇絕餘霞映袍袖嵐翠尚明滅何當躡蒼虬長揖衆  
仙列提攜兩赤松永與塵世別

寄三衢易使君惟效約秋深為爛柯之遊并懷  
蔡景明蘇以脩

易侯意氣天下無蚤年宦籍通皇都豸冠繡服天咫尺  
風裁落落長安途一朝使酒忤權貴憑陵太白歌嗚嗚  
埋輪有疏不得上拂衣大笑遊江湖瀟湘雲夢長在目  
却來東海談乘桴五花雙轂御史馬百里仍躡仙郎舄  
江郎峨峨三片石屹立千仞東南孤題詩灑墨登絕頂  
白眼瞋視天模糊桑田滄海倏變易九重特詔還金鋪  
梅花遍咏水曹雪清源皂蓋停菰蒲憶昔扁舟駐東郭  
驀然見我心神孚鹵簿江州却羣從胡床明月邀呼盧

蘇別駕蔡大夫十日九日黃公壚夜擊青萍唾壺碎晝  
拈綠玉楸枰枯清源明粧十萬隊紅裙翠袖驕相扶淹  
留卒歲不忍別春風拂面吹屠蘇雲萍忽爾推浪迹平  
原河朔成虛無踟躕蘇蔡各分手閩山蜀道難追呼君  
侯政績何煒燁立驅千騎來東吳窮交念我宛如飛  
書徃徃尋屠沽一丘獨卧子真谷入門三徑嗟荒蕪雕  
蟲小技何足論眼空六合成狂夫青霞之君日候我斧  
柯欲爛三蓬壺玉局縱橫衆仙列雲鬚一吸三千觚使

君倘許岬情過秋風八月來高艫

章生持所業遊余門詩勗之

火雲崢嶸照林薄赤日團空坐如灼高堂褰幃者誰子  
云是香溪少年章敏學少年十九能作詩沾沾欲問揚  
雲竒先生四十髮種種抗顏肯受庸人嗤新詩讀女吾  
動色東野窮愁浪仙僻電光雷鋏雙芙蓉爛漫苔痕土  
花碧君不見神物不過張司空萬古豐城白虹泣

小園杏花爛漫與客攜酒酌其下至醉

牆頭昨夜春風顛醉著接離花下眠東方欲曙忘晨飧  
應門何客來翩翩城東郭君履欲穿手持三百青銅錢  
要我為客開瓊筵水晶之壺白玉盤銀箏翠管張哀絃  
吳姬度曲越女彈相將載酒臨西園西園萬樹紅照天  
杏花朵朵含春烟隨風故落蒼苔前恍如紅雪堆青錢  
摘花浸酒酬清酣主人勸客客不言人生豈得長朱顏  
眼前有酒不盡懽參差白髮來相纏君不見相如卧病  
歸文園笑殺長安羣少年又不見子雲寂寞耽草玄日

暮何人迴酒船何如醉挾雙嬋娟玉山酩酊長花前

秋日泛舟錢塘觀潮放歌

黑風夜簸滄溟水馮夷却走海若靡素車白馬來何方  
璇室瓊樓遍空起玉龍垂地五千丈銀河駕天一百里  
三軍鉅鹿戰始酣萬甲長平潰難止胡生此時歸適越  
醉挾扁舟離江渚鼓柁初疑月窟中旋身已入冰壺裡  
雪山恍見釋迦坐一葦聊將達摩擬波翻颺颺泣浪跋  
天吳語長鯨鼓鬣如峻山電掣雲愁墮飛雨舟人漁子

袖手不敢出蓬底倉皇掩其耳是日胡生氣無比輕橈  
在手疾于矢白眼茫茫向天際欲乘長風破萬里迴瞻  
圓嶠若咫尺東望扶桑聊徙倚即如魯連蹈豈得便逐  
靈均興難已君不見越王宮吳王宇寂寞空屋半頽圯  
日夜寒濤浸荒址滿眼豪華遽如許人生齷齪胡為爾  
乘槎八月差快意擊楫中流竟何以天寒日暮風轉疾  
彷彿鷗夷共相語朝來更泛若耶棹會挾西施從范蠡

釣臺謁嚴祠作

高臺倚空雙突兀釣絲下墜桐江石客星慘淡呼不應  
片片飛雲向人立憶昔真龍起新野百萬昆陽碎如瓦  
朝端但訪赤伏符澤中那問羊裘者逍遙建武垂裳初  
乃有物色來菰蘆新銜乍可授諫議故態寧肯迴狂奴  
長嘯還歸富春瀨采藥桐君坐相待石上明霞照秋水  
峯頭雪瀑飛寒籟箕山潁陽杳莫覩太息斯人遂千古  
方干謝翱兩小子廢宅荒墳強為伍胡生抗志五岳前  
中歲偶落風塵緣釣竿倘拂紫薇坐歸來與爾共拄東



南天

夜飲芙蓉館大醉放歌寄黎惟敬康裕卿李惟

寅朱汝脩

初平騎羊去不返沈侯八詠空嶙峋劉生老死駱生竄  
誰令大壑迴陽春君不見蘭州胡元瑞九齡學仙已成  
癖欲乘長風遊八極大鵬扶搖不肯騎幾度鞭羊復成  
石十五更作咸陽遊五花笑脫青貂裘酒闌大叫呼李  
白雪花飛墮長安樓是時真龍御皇極雙闕嵯峨象緯

闕作賦寧論狗監知曳裾自許龍門客人前白眼雙飛  
揚誰其握手黎惟康李侯晚散禁廬直停車數過朱生  
堂相看意氣誰肯下握麈含毫破深夜萬象淋漓碣石  
宮千人辟易華陽社五陵軒車春不開狂歌獨上黃金  
臺拔劍起舞長虹推睥睨燕昭王豎子非仙才荒碑零  
落翳榛莽其人白骨隨塵埃劇辛郭隗豈壯士汝曹自  
爲千金來當時迺公用齊國臨淄豈得同蒿萊前瞻涿  
鹿野左瞰盧龍隈浮雲萬疊飛不盡但見太行山色青

崔嵬入洛聲名晚差著掉頭忽出新豐市拂袖初辭上  
苑花持竿欲挂滄溟樹呂梁震澤天茫茫扁舟一葉飛  
錢塘鏡湖剡溪咫尺不得渡十月寒濤如雪霜孤峯指  
點嚴陵宅古木槎牙向人立羊裘客子雙眼青分我桐  
廬半江碧高臺祇合長垂綸誰知物色來衡門天闔突  
兀帝星遠十年五上空沉淪蘿薜歸來手還葺一笑文  
君壁空立生計猶餘二頃田謀身豈必千頭橘五侯七  
貴俱浮雲鄴侯萬卷堪橫陳男兒大業在金石那令七

尺隨風塵醉墨蒼茫浩歌發紫氣東來照吳越文章得  
失心自知肯向朱門傍先達唾壺擊碎歌轉長美人天  
外空彷徨眼前齷齪誰相望大兒劉孝標小兒駱賓王  
後生不死亦前輩九原可作同翱翔遙遙八詠樓樓空  
竟何有樓中之人今在否祇今誰是東陽守會叱羣羊  
起太空卧看扶桑日西走

賦得赤松宮為東陽盧祠部

君不見赤松宮前赤松色天矯輪囷際天碧霜皮不減

三萬株鐵榦寧論二千尺初平騎羊去不迴藥爐丹竈  
空崔嵬山中白石亂無數何人叱咤飛風雷君不見東  
陽盧君大奇絕前身曾受長生訣往來三洞躡明霞嘯  
傲雙溪弄明月竭來欲作人間游蒼生六合攢眉頭帝  
傍玉女不敢留飛行獨下崑崙丘挾書却走明光殿躍  
馬天街誰不羨柳色陰濃彭澤車桃花錦簇河陽縣一  
朝鳴珮趨南宮爐香畫省追夔龍退食羞爲素餐士願  
將直筆迴宸聰五夜排雲叩閭闔凜凜孤誠照丹闕丘

填寧增泰山峻微絲願補衮衣缺九關竄窳環蒼龍燕  
臺白晝飛長虹曳裾止輦亦臣職拂衣神武來秋風衡  
門却返東陽舊落落松陰浮遠岫已見聲名重斗山更  
欲棲遲終宇宙名山咫尺黃初平石羊成陣來相迎天  
王明聖臣願足富貴浮雲何足論盧君盧君真丈夫直  
節祇今天下無從我且酌黃公壚漫學三閭賦沅水肯  
令董相淹江都一朝當宁思良弼飛詔東山起安石會  
教霖雨遍遐荒取次天門生八翼赤松之宮君暫居高

吟抱膝聊吾廬三洞寧為長往客九重行問治安書

題岳陽樓圖

危樓倚空欲千尺闌干下瞰洞庭色狂風盡捲蒼梧雲  
萬頃瀟湘照空碧江花冥冥日欲冷岼芷紛紛翠猶濕  
參差忽覩馮夷舞縹緲疑聞帝妃泣七澤縱橫渺難數  
九疑如黛尊前出舟人漁子棹空曠薄暮波濤歸不得  
樓中騎鶴誰者流此事恍惚曾同遊憑闌試誦杜陵句  
日夜乾坤相對愁

歲杪送鄭茂才北上

北風動地捲行色鄭子辭家赴京邑  
蹇驢欲踏東華塵手挈空囊行不得  
親知遍謁乞斗水徃徃白眼誰相識  
男兒意氣輕王侯有身七尺那用憂  
溪頭握手拚一醉  
驪駒且付黃公留君不見來歲長安  
百花發銀鞍擁簇  
歌姬樓



少室山房集卷二十三

欽定四庫全書

少室山房集卷二十四

明 胡應麟 撰

七言古詩二十六首

閔蓬頭歌 代滕中丞作

閔先生羽客流髮蓬蓬不束頭身騎兩白鹿手解霍青  
虬前生七聖相追遊飛翔八極橫九州朝升大羅頂暮  
宿崑崙丘木公授寶籙王母發清謳飛瓊弄玉衆仙女

行厨上食羅珍饐桃花萬樹核如甃東方小兒不敢求  
何來醉闖拘翼座脫巾露頂眠瓊樓雷公轟轟上帝怒  
謫向下土稱蓬頭長身大腹狀殊絕赤髭紅頰驚庸流  
方瞳射空碧電炯紫髯拂地蒼虹流終朝一食氣逾王  
終夜不寢神長游嚴冬雪片大於席寒氷十丈風颼颼  
先生此時赤雙足單衣不御青貂裘道旁觀者色沮喪  
真仙出世誰能儔和光頗類柱下史玩俗或比蒙莊周  
仰天大笑暮雲碧茫茫下土皆蜉蝣蛄來偶過勾曲洞

乘鸞跨鶴三峯頭  
乘龍左耳割不得  
飄然一葦來南州  
衆中遇我心莫逆  
片言立使千金投  
微辭奧旨發中夜  
變化恍惚難先籌  
時時詫我骨毛異  
青城僊伯行相求  
三生石上事非遠  
努力繕性窮熏修  
愧我中年薄聞道  
塵埃碌碌隨軒輶  
神明凋謝鬢髮改  
豈將七尺圖封侯  
感君便欲逐君去  
乾坤萬事同浮漚  
三公七貴竟何物  
五陰四大俱懸疣  
何如長嘯出寥廓  
霍然盡豁平生愁  
閔先生且莫行爲  
我留  
謫期未滿堪夷猶  
吾家別業武

夷上鐵船丹竈懸高丘幔亭之君日來下三山九曲隨  
冥搜他年挾爾擢歌去坐看大海天咫尺巨鯨翮屬浮  
中流珠宮貝殿耀金碧清都絳闕喧琳球鷗鵬一卧九  
萬里鴻鵠一舉三千秋玉皇香案倘相憶羽翰白日飛  
神州

賦得靈隱寺飛來峰贈盧祠部

靈隱門前千歲松夾堤九里來青蔥何年突兀金芙蓉  
削成四面摩蒼穹恍疑夸父移空同一拳擲向滄溟東

日月東西懸混濛雲霞上下披蒙茸周遭刻畫非人功  
象王鶴駕行虛空投身直入蓬萊宮丹樓雪乳垂玲瓏  
流泉百道聲琤琮有如仙樂鳴笙鏞金書玉簡潛竒蹤  
竚窅恍與銀河通靈威丈人不得窮古來傳是飛來峯  
萬古壁立青霄中何人散髮攜孤筇捫蘿直上乘天風  
金華有客真英雄孤高大節將無同少年挾策遊新豐  
五花蹀躞長安驄出宰百里花為封鳴珂入候甘泉鐘  
握蘭典禮稱儒宗素飡恥學凡夫容織成雲錦蟠心胸

要將琬琰垂勲庸直排閭闔陳孤忠曳裾折檻驚天聰  
轟轟天鼓鳴雷公覆盆不照微臣悰精誠貫日飛長虹  
挂冠神武何匆匆迴頭却望丹宸楓血淚亂灑征衫紅  
歸帆正值錢塘風六橋三竺春溶溶不學留侯師赤松  
且邀白傅尋蘇公振衣千仞聊從容朝飧沆瀣追冥鴻  
暮拾海月鞭虬龍六丁撝呵玉女從俯視六合俱螟螣  
竭來遇我東陽東竹林把臂心神融仰天大笑橫雙瞳  
欲騎箕尾還長空盧君勸汝滿酌黃金鍾且為拂拭朱

絲桐萬事人間如轉蓬  
古來直道多難容  
卽今吾道寧終窮  
絲綸竹帛行遭逢  
一朝前席明光宮  
誰其穩卧飛來峯

醉中放歌贈祝生并寄司馬汪公

祝生家無擔石儲  
短衣掩肘不願餘  
生年三十走牛馬  
世人攘臂爭揶揄  
胸中壯氣何磊落  
眼看俗子如蘧蒚  
欲從翰墨樹勲績  
恥結黃綬懸金魚  
自言太古重三立  
文章功德原無殊  
竭來叩我草玄宅  
殷勤片刺通前除



先生崛起劉駱後華名岳岳天南隅泰山寧擇土壤細  
滄海詎惜涓流瀦蘭臺高揭並二酉龍門咫尺懸桑榆  
堦前尺地倘少假令我一嚮嘗天厨伊余謝客事焚掃  
閉關長日扶潘輿親知宇內半凋落豁然見汝心神愉  
憶汝新都謁司馬太函突兀開雲衢無殊字汝豈無謂  
樹勲努力操長戈汝兄汝姪並瀟灑問奇往往來吾廬  
古今詞賦厄陽九先生身試不汝愚怪汝胡為蹈前轍  
甘心趙瑟忘齊竽腰纏萬貫亦不惡三槐九棘垂駒駟

沾沾五字作何狀黃金不逐貧相如生乎大笑掩余口  
先生戲我猶羣兒天生七尺當不朽大千世界皆蘧廬  
倘來富貴寧足論電光石火同須臾一朝腐骨委草莽  
醉生夢死隨溝渠秦宮漢闕走狐兔公卿未必贏樵漁  
男兒大業在金石要令天壤留迂儒先生兩耳濯清渭  
十年不受凡人諛終朝隱几吾喪我一聽汝言良起予  
雄談五夜劍花落綠尊翠杓行茱萸高歌贈汝兔毫禿  
唾壺擊碎青瑤璫長風吹雲入廣座欲躡象緯凌蟾蜍

生乎生乎汝勿疑古今不朽真無殊好讀離騷飲美酒  
便作名士追三閭莫將狂簡訝年少仲尼大聖思歸歟  
卽今名姓已不朽先生筆底開璠璣他時藉手見司馬  
為我捧腹當軒渠祝生樹勳遊新安司馬公字之曰無殊謂所立維三不朽一也石羊生胡元瑞聞而題之而作是歌

瀟湘座為祝無殊題

我築瀟湘島斗室懸竹中汝構瀟湘座千竿舞秋風我  
島舟可沿汝座車難通一朝乘興來子猷直造竹所聊

優游主人莫作辟疆態仰天大笑風颭颭

送郭汝冲遊吳中

郭生有父鴻臚君自言東野之後身飡風卧月三十載  
至今詞筆留長春生也學書仍學劍抱玉無媒羞自獻  
延賓雅有郎罷風典盡鸛表不咨怨時時問字來門牆  
先生為汝開玄堂五月南風稻苗熟扁舟一葉飛錢塘  
生平不識瑯琊里特向婁江弔蘭芷中原萬里失麟鳳  
宇宙文章孰盟主江陰亦有朱鴻臚結交四海雄拔蘆

沙頭把袂詢父友孤帆八月來三吳

憶章雲

去年送子城之北北風怒號天慘戚濃霜密雪洒岐路  
若箇綈袍話相識今年憶子城之東落花爛漫飛春紅  
人生好遊遊亦得五見社燕迎歸鴻岳陽樓頭秋萬頃  
醉殺杜陵呼不醒何時挾汝荆門濤狂歌痛飲賡離騷  
哭祝鳴臯

鳴臯既避地齊東復客長安而死同里友人

胡應麟聞而悲之作歌弔焉

吁嗟祝生誰謂而年僅止此爾胡以生胡以死文章獨  
抱掩夜臺寂寞寒山餓妻子憶生束髮負奇尚壯氣凌  
雲薄金紫繩樞甕牖窮徹骨恥向豪門謁涓埃世人妬  
生狂欲殺白眼縱橫半睚眦青衫一領不得消擲向齊  
東營耒耜胡為復作長安遊蹶躅芒鞋污泥滓嗚呼大  
塊亦忌才玉折蘭摧緊誰使昔余與生初結交邂逅塵  
埃雙國士拂衣初上西山巔萬岫回青八陵紫崢嶸高

論駭俗流磊落雄心付良史生今已矣寧再得泪目淋  
漓傍桑梓酸風落日華陽宮素旄翩翩潞河溪孤墳三  
尺暮雲白白馬生芻者誰子我歌薤露生莫悲自昔賢  
豪並如此

寄張伯起

去年我病維揚邸日望琴高騎赤鯉一朝起色乘江潮  
朔風狂雪吹綈袍吳門邂逅張伯起萬卷縱橫列湘几  
蓬蒿夾徑春不開焚香永晝眠蒼苔翩然為我倒屣出

握手論心稱莫逆烹熊魚鱉出豐膳繡虎雕龍指金石  
男兒七尺當自強巢由豈必攀虞唐千秋大業在竹素  
胡為燕雀譏鸞鳳抽毫日纂文選註恍入梁臺試精騎  
倘來富貴詎足論避世牆東有深意陽春堂上橫朱絃  
子夜歌成興杳然他時倘慕蘭陵宅日候山陰訪戴船  
登大雲山望潑水寄李允達

憶昨曾攜李仲子醜酒遙登潑江渚美人一去秋水寒  
望望蒹葭隔烟浦朝真洞口饒白雲尺書天際時相聞



山棲倘續孝標志與爾同棲麋鹿羣

祝太學遜之五十始為詩戲作短歌贈之

君不見天寶詞人高達夫行年五十執金吾一朝作詩  
遇杜老聲華奕奕留吾徒君不見成均胄子祝懋學五  
十無聞甘寂寞一朝壇上逢胡君奮臂詞林問前嫂沉  
吟二事迹頗奇千載何當復遇之汝為常侍理或有我  
說杜甫人爭嗤丈夫有志未可輕古人詎必皆無成杜  
陵四十始獻賦當時頗遭俗子凌脫身錦里拾橡栗長

鑱短褐徒悲鳴達夫青雲本自致高牙大纛懸長城鳴  
呼後世兩寂寞惟有隻字留其名我今四旬汝五十二  
子之年巧相值焉知異代無子雲未信東山少安石男  
兒致身苦不蚤髮短心長恨何及我歌杜陵念已灰汝  
效達夫志當立不見甯越師諸侯努力餘年莫輕擲

琵琶行

李將軍虬髯戟列橫秋冥當關壁立萬夫勇掃空大漠  
無王庭一朝謝事東海上皓首華顛氣逾王醉歸叱咤

灞陵尉長揖嫖姚不相讓欲將雄劍賣黃金却把琵琶  
彈素心淒清激烈風雨過高樓五月如山陰君不見賀  
懷智石槽鐵撥雲雷氣唐家供奉推第一青史流傳誇  
絕藝君不見康崑崙指下縱錚捷有神玉盤驪珠千百  
轉春冰拆裂河流渾將軍岳岳起當代手挈二子成三  
人卽今狼居盡歟塞九邊鐵騎聞黃雲明妃奉帚長信  
殿娥眉不踏燕山塵山西老將亦無用金甲苔生土花  
重笳聲寂靜刁斗寒但把琵琶學三弄華堂秋空月滿

楹朱絃翠幙流明星觴行樂奏豪興發快劍長戟紛爭  
鳴為君慷慨彈入塞莫作琵琶亭下聽

寄鄴中王孫灌父時約余為嵩少之游

昔我年少思遠遊飛行八極尋浮丘夢寐三花映絕壁  
崑崙倒挂黃河流主人況有淮南術要我峯頭鍊金液  
石林萬仞掃空翠念載無人白雲濕亭亭孤鶴來縑山  
王喬有約予當還今年曳杖定偕汝三十六峯秋月圓  
嶺南初羨仲以詩見貽賦答并問惟敬祕書

南海初生何卓犖題書遠寄吳天鶴開緘恍對四百峯  
片片羅浮白雲落年來嶺表多詞人黎歐以後誰其倫  
丈夫寸心在萬古那能齷齪隨風塵聞汝好吟兼好酒  
一釂千鍾世希有黎生夙昔稱酒狂對汝還能劇飲否  
高陽酒徒氣若虹有興倘過蘭陵東不信今時酒殊絕

試問瑯琊王長公

長公近一書云酒味殊絕足洗數十年月旦

余在婁江日孫齊之徐孟孺同日先後過訪余  
以行迫不及報謝追憶二君輒成短歌

孫郎已老徐郎少一日婁江逢二妙趙家白壁總連城  
海上明珠雙照耀孫郎髮短垂六旬徐郎三刖仍干秦  
余亦狂歌稱隱淪虎溪相別成大笑滿眼人間失意人

兩得歐楨伯書及致西署秣陵二集走筆寄謝

詢其蒼頭李英

王生手持雙鯉魚剖之中有明月珠鮫人夜泣魑魅走  
珊瑚十萬羅前除美人吏隱金陵畔金馬銅龍誰不羨  
緩轡晨過莫愁里鳴珂夜入明光殿秦淮千里心悠哉

澱水蘭橈那得開  
君家摩勒有佳句  
祇今何似郝方回  
題瀟湘烟雨圖

桂樹叢生石嵒側  
萬仞寒雲挂蒼壁  
窮陰大澤龍蛇走  
綠蘿蒙籠楚天黑  
行吟澤畔者誰子  
日暮欲歸歸不得  
黃陵美人把瑤瑟  
杜宇啼烟鷓鴣泣

詹東圖有茶癖  
即所居為醉茶軒  
自言一飲輒可數  
百杯書來索詩戲  
成短歌寄贈

吾聞盧同有茶癖  
七碗清風生兩腋  
吾聞陸羽稱茶仙

銅餅細酌中冷泉古來知味但如此吐吐新安詹仲子  
胸吞雲夢蟠瀟湘一飲百碗消枯腸虎丘之產茶僅斗  
盡采遺君不盈口蒙山石上青槎牙咀嚼那能煩齒牙  
斟酌建溪三百餅巨杓長瓢堪醕酤風爐竹几羅庭除  
大鎗貯月來中厨松風才過魚眼發玉乳盈缸噴香雪  
鯨吞鰲吸如有神淋漓醉墨馳風雲一飲一揮三百首  
若箇能詩復能酒胡生十載戒飲茶金莖日夜烹黃芽  
天瓢一滴欲冲舉刺刺文君未相許羨君豪興為汝歌



歌成擲遡桐江波明年倘憶吾鄉茗穀雨前朝赴龍井  
夜集郭鴻臚館偶聞鄰室有使酒相虐者余為

解紛竟戲作短歌示鴻臚

古人飲酒戒沉湎一石蕭然神不亂今人飲酒如沐猴  
脫巾狂叫無時休雙眼茫茫向天白知交側目成慙尤  
清音軟語有何意白波平地如山丘君不見張旭滿引  
揮雲烟李白一斗詩百篇遇汝那得開心顏又不見劉  
阮朝朝竹林醉當日高談遇此輩大白流離玉缸碎

謝文度年八十餘而步履輕健如少新秋棹小  
舟十里過訪且拉余往閩中曰武夷君遲子  
久矣余大壯其矍鑠于其行也賦短歌以訂  
後期

謝君束髮湖海狂飛騰若木窺扶桑只令九十健于虎  
白睂紅頰雙瞳方伯陽我師呂公友玉笈雲章佩星斗  
人間獨好胡生詩千里拏舟潑江口自知名姓在瑤京  
塵世蜉蝣那得聞朝來共跨赤虬去玉笙吹向武夷君

夜同方吳兩生集汪士能宅留宿作新都豪士

歌

君不見新都俠客汪士能意氣磊落形骸真鬚髯如戟  
鬚如蝟泰山一擲輕千鈞大腹便便亦何有半生但貯  
宜城酒日倒青蓮三百杯家藏白墮五千斗暮春三月  
日頗長杏花半落梅子黃先生白眼空四海却來岩市  
登君堂堂上吳生宛如玉座右方生迥超俗博山爐中  
沉水香玳瑁玻璃照醺醺相看一笑輕王侯長鯨跋浪

風雲愁主人尚醒客已醉  
熒熒華燭開朱樓綉縹紗茵  
迴奇麗一卧明窻不知曙  
感君意氣為汝歌贈汝狂名  
在天地吁嗟乎世途局促難  
為容賣衆隱博甘途窮身  
後榮華竟誰是眼前尺蠖嘲  
蛟龍生家伯兄文且武驃  
騎才名駕千古二兄三兄咸  
楚楚生也第六之名詎減  
五伯兄司馬二兄仲淹三兄仲嘉士能行適第六故云城東紅粧十萬家  
朱唇翠袖爭朝霞相逢不飲  
漫成別參差笑殺千桃花君  
不見杜陵布衣老且拙典盡  
春衣興逾發黃四娘家花滿  
蹊大白

攜生醉明月

翌日全集方羽仲宅則王生為大力者負之而

趨戲作短歌題汪氏壁并示汪吳二子

豐千里畔方千宅喬木森森向人立高堂淨掃無纖  
塵片片明霞傍檐入主人古貌仍古心市隱蓬蒿甘陸  
沉片言遇我心欲醉鸕鷀立解千黃金春日春盤薦春  
韭白粲鮮鱗無不有乍可朝眠杜曲花那能夜欠新豐  
酒溪南兩岸烟樹深美人不見愁人心

用盧全語

暮雨朝雲

杳何處明月香車返岩市

夏日同吳叔思東陂觀蓮

若耶之溪五十頃綠暈紅酣畫船暝吳王宮中十萬粧  
明霞為珮風為裳簫鼓參差棹歌發隔岸清波照羅襪  
年少誰家雙紫騮坐看玉腕明中流日暮香風四天起  
惱殺金陵謫仙子

題山房梅花帳

剡藤為簾湘為簾十幅吳綃更奇絕羅浮狂客劉世儒

一掃贈我千峯雪主人清夜眠其中羽衣恍惚來相從  
參橫斗落不知曙一枝醉抱春朦朧

送張英甫歸永嘉因詢康山人裕卿

兩年不見張山人阮公眼白誰相親草堂何來下孤鶴  
青山歲暮迴嶙峋長揖辭余復行邁指點龍湫白雲外  
語汝山中康裕卿萬尺飛流好相待

題宣和帝御製楚江秋晚圖

當年曾挂瀟湘席歷歷雲山似相識長憶江頭紅樹村

千林落照催行色隔岸人家草屋深憑闌浩嘯舒塵襟  
長天茫茫鳥飛絕潮落汀洲龍夜吟隱見漁舟泊沙阜  
莎邐寒烟莽迴互羣仙可望不可招虛閣凌空挂烟霧  
兩翁矍鑠巢許儔崇岡之北茅堂幽登登迴顧蹇驢客  
撩亂瀑花天際流何人筆底開層巘貌此江南秋一片  
瘦金書法了可驗恍惚似入宣和殿

嚴陵晚泊

嚴公昔未遇畊釣日沉冥一朝動人主始識少微星余



亦任公子垂竿三十齡被髮上高臺浮雲空翠屏雙磯  
拳石那可坐却望三山游四溟袖裡虹霓一千尺手掣  
鰲魚歸帝庭

少室山房集卷二十四

欽定四庫全書

少室山房集卷二十五

明 胡應麟 撰

七言古詩一十五首

白紵歌二首

葡萄之酒琥珀缸  
金壘玉竿春茫茫  
博山爐焚沉水香  
翠屏朱戶羅笙簧  
援琴鼓瑟流清商  
洞簫過雲聲飛揚  
珠簾不捲凝夜霜  
千花萬花夾華堂  
明星爛爛出東方

左挾安陵右龍陽美人翠袖嬌紅粧秦娥衛女紛成行  
願君一盼生輝光清歌盈盈繞畫梁夜如何其夜未央  
黃金為堂白玉椽翠屏珠戶羅嬋娟流蘇帳煖春茫然  
鴛鴦錦被裁合歡明眸皓齒嬌相憐三星煌煌月在天  
燈長燭明興未闌都梁甲煎焚華軒茱萸蘇合紛纏綿  
非烟非霧非人間引宮刻羽鳴幽蘭崑崙之觴斗十千  
美人垂手臨風前迴身雜佩何珊珊珊瑚火齊間木難  
腰圍尺六笑渠鮮驚鴻宛轉飄瓊筵雙成弄玉俱神仙

夜如何其夜漫漫

行路難六首感事作

君不見竿頭鳶乘風浩蕩遊九天君不見棟頭雀百尺  
憑虛俯寥廓君子雌伏安蓬荜小人雄飛勢揮霍乞哀  
中夜如鵠鷗志意滿極驕庸流時移事改惡聲播遺臭  
墻間萬夫唾君不見公孫張儀稱丈夫至今行乞羞庸  
奴

君不見盤中蠅變幻黑白如丹青君不見市中虎利口

紛紜捷桴鼓君子推誠洞腹肝小人柴棘橫肺腑讒言  
交構四國譁貝錦百匹張雲霞邦家覆敗手足露絕臄  
剗腸示行路君不見江充舉族無極殲有北陳詩盈簡  
編

君不見帳前蚊侵肌嘍肉無時停君不見襟前虱飲血  
啗膏罔休息君子守道甘困窮小人聚斂恣胸臆谿壑  
之欲浩無涯狼貪蠶食肥私家禍盈孽滿罹刑辟崑岡  
火延灰玉石君不見梁冀籍賢元載誅黃金滿谷成丘

墟

君不見波間蜃吞吐樓臺倏千仞君不見巖間蛛四張  
羅網迷空虛君子行善苦不足小人濟惡才有餘沉機  
伏弩絆飛走變幻譎張何不有術窮數盡來天刑青冥  
白晝飛雷霆君不見林甫剖棺檜醜繆千秋永劫昭大  
戮

君不見牆畔蝎猛刺如山蝕金鐵君不見澤畔蛇惡氛  
湧霧張獠牙君子乘時沛膏澤小人併日行兇邪一朝

無處肆酖毒餘憤憑陵螫草木噬人既盡陰禍延刀鋸  
鼎鑊快意殄君不見陽由棄市俊臣族天道好還如轉  
轂

君不見海中鱷利齒如山逞兇虐君不見穴中狼巨口  
如城當道傍君子好生戒苛慝小人毒害盈剛腸積尸  
纍纍血成塹意氣揚揚了不變神人共憤罪惡盈百骸  
分裂宇宙腥君不見董卓然臍侯景滅萬古元兇戒車  
轍

圍棋歌贈黃生應魁

嘉隆奕者師鮑髯敵手燕臺惟小顏瑯琊門下角程李  
斧柯欲爛天東南四明岑乾出稍後自說髫齡遇神授  
一時諸子皆偏師何能突過顏鮑右邇來國手歸維揚  
方生日新最擅場天馬行空絕蹊逕喧啾百鳥鳴鸞凰  
會稽黃生名較晚負局攜家傍天苑蹇驢破帽春明門  
落落乾坤孰青眼當時奕道頗有聲十年賈勇爭時名  
一朝神理洞仙著驂騑獨步長安城落子潛思動移日



夢入巴邛四仙窟有時大敵交中原往往一枰竟秋夕  
兵鋒所指無羣雄錚錚劒戟摩蒼空虛堂斐几對剝啄  
晴天雨色交長虹猛若重瞳戰鉅鹿奇如鄧艾收西蜀  
槎山通道捷有神斬壁開關恣騰逐卽當死地偏用奇  
背水援桴號令馳俄看赤幟樹高壘股弄強敵如嬰兒  
倏忽長驅走雷電太白經天助鏖戰全齊陡下七十城  
雄趙一坑四十萬長安五侯不乏材連雲甲第朱門開  
高軒駟馬競延致爭先結襪黃金臺黃葉盈庭僕夫卧

風雨蕭蕭燭花墮  
斧柯幾爛局未終  
不覺晨鐘徹高座  
唐時供奉誇積薪  
豈家嫡繫後身荒  
丘仙姬姑若婦  
九枰口訣留千春  
丈人耽奕自蚤歲  
飛將詞林絕無對  
茂弘五品輸江郎  
遇爾那能不心醉  
嗟嗟黃生意氣豪  
豈徒覆局兼含毫  
上書無路謁明主  
狂吟易水風悲號  
世人沾沾事酒肉  
高蓋峨冠耀流俗  
生徒工奕仍工詩  
老向金華走碌碌  
黃生黃生歌莫哀  
三公九列俱塵埃  
不見東南八萬仞  
寥天石室青霞開  
奕罷兩奩收白黑

局上虧成總虛擲乘雲且逐胡先生跨鶴鞭龍訪太乙  
後圍棋歌再贈黃山人

隆萬以來攻奕者歟有小呂閩小蔡黃生崛起禹穴中  
倏忽時名共當代丈人卅角遊長安國手何人不針芥  
鮑顏二李盧及岑次第攜枰入東岱中原豪傑屈指空  
晚得方生最稱快方生巧思凌古今游戲神通了無礙  
永嘉方生並時出名姓俱同劇堪怪少年復有六合王  
浸浸澠池欲興代黃生善戰尤自負夙昔疆場構呂蔡

方生之下三子優叱咤登壇勇莫逮有如孟德肩孫劉  
鼎足三分建旗蓋基雖小道實可觀生也精進迴不懈  
并吞割據弘霸圖劫殺侵漁盡變態楸枰落子大勢分  
先著紛紛布要害吾觀此道與兵合一一為子陳梗槩  
攻城略地創都邑背水依山列營砦發縱元勛首帷幄  
指畫奇謀洞著蔡援桴擊鼓事征討躍馬橫戈奮驕怠  
湘東一目寧久長大舜重瞳迄推戴三千牧野行造基  
百萬昆陽坐奔潰大軍涿鹿平蚩尤孤卒鴻門闔樊噲

混壹區夏秦有權表裏河山晉無害成臯堅壁控土宇  
函谷封泥距關隘含枚定陶襲項梁卷甲陰平走鄧艾  
七縱七擒啟荒服八戰八克定邊塞歲時吳魏爭長江  
日夜梁唐鬪夾寨乘風帥衆下井陘冒雪潛師抵淮蔡  
晉陽三版浸難沒卽墨殘都守無奈闔閭貪欲甚蛇豕  
幻踐陰謀梁蜂蠆推鋒白起勁若飛持重廉頗老能耐  
盧梭李密王世充鷸蚌高歡宇文泰東西並舉騁全力  
南北中分各兩大氣盈量滿墮成功忿削貪亡示明戒

入神入聖窮幽微爲虜爲王決成敗棋與兵合種種然  
始作何人世沾漑相傳放勲教丹朱上聖無緣發機械  
或言戰國尚雄略餘習縱橫此流派丈人髫歲負棋癖  
錚錚鐵中號亡賴一枰懸榻晝夜攻寢食俱忘減腰帶  
迴光返照念載餘四大部洲任成壞胡來遇爾重作歌  
見獵渾忘喜心汰下車搏虎衆欣悅拍手其如士林訾  
尚憶斐旻舞劒時道子揮毫攝千界崔家延伯每臨陣  
亦藉僧超鼓豪邁雄才絕藝兩間值憐汝求言日瞻拜

虛堂洒墨元氣流萬壑寒風度天籟君不見休仁中正  
蚤已沒待詔師言近誰再仲甫四篇差足存伯祥三路  
逝安在由來一局塵世空底事妻兒溺貪愛君不見巴  
邛仙橘大於斗商山四翁樂相待九枰輸我愿未酬會  
擘龍肝了餘債他時負局尋先生洞壑金華亂峯外  
會稽黃生奕為過江第一流而詩亦佼佼一日邂逅  
黃金臺上持卷乞余贈言嗣是亟見亟請今且逾十  
八載矣顧余卒卒亡寸晷之暇仲冬扁舟北歸楸枰  
塵積不勝技癢因抽筆為長歌食頃便成餘興勃勃  
復撫拾古今與兵家合者數十百事餽飭茲篇勉之  
黃生努力精進異日者荒郊仙姬可亡請益於九枰

外笑

武林大雪程太學仲凱邀同張總戎黃刺史徐  
司理錢文學呂山人汎棹湖中泊南岸放歌  
徒步入龍井汲泉淪茗延賞至暮迺歸

雪花夜半飛三竺萬壑千巖恍如玉新都程生太好事  
曳杖清晨叩茆屋手持三百青銅錢要我湖頭豁塵目  
茂先叔度錢及呂斗笠芒鞋恣追逐偉長詩思亦橫發  
首御肩輿入窮谷觴行到手不暫停鸚鵡鷓鴣互相屬



人比竹林差有餘客方蓮社寧不足階前奇石疊層巘  
洞底流泉吐深麓山僧淪茗作清供色香味美迥可掬  
蒲團渠几媚優鉢竹院明窓照蒼筤幽深若與塵世辭  
昏黑將求上方宿或言獐虎山下過吾意神龍井中伏  
諸君先發余少畱爲語平頭免刺促四百八十金銀臺  
會策黎眉入天目

錢象先過訪深雪中往報不克短歌柬之

武林夜半北風疾雪片垂天大于翼孤山老梅僵欲死

跨蹇呼舟漫尋覓東吳錢生住昭慶擁褐高眠送長日  
吟成字字敵瓊瑤皎若天花墮禪席憶生三月來武林  
嘯傲西泠事琴奕憐才總稱陸士衡好士亦有徐元直  
窮愁骨相自古然典盡鸛裘壁徒立沾沾訪我空巷中  
把贈明璫示親暱風塵勃窣奔走咫尺錢塘夢瓢笠  
朝來策杖擬尋汝泥濘堦除沒雙屐美人娟娟隔湖水  
一望雲山思無極登壇大老儼欲盡藝苑今誰占名籍  
羨君咳唾饒珠璣下里十夫走辟易文通老朽嘆才盡

形穢那能不趨匿醉拈秃管書短章小刺聊當正平擲  
他年把臂姑蘇臺倘許忘年訂金石

仙橘行贈呂生

呂生好奕良有年口如懸河決百川憑陵負氣雙眼白  
強項肯伏公卿前自言勍敵止方蔡三人海內李孟間  
楚中近有朱氏子黃王以下知無前竭來武林四閱月  
室中新盡晨無烟臨安富兒不好事日夜空囊捫酒錢  
一朝遇我湖水曲脫巾大叫狂呼天先生名姓久岳立

願得片語垂人寰憶乍持刺遠謁我蹇驢薄暮西長安  
塵埃碌碌不稱意雲萍此地仍周旋試生伎倆果精絕  
疾風飛雨鳴華軒唐時待詔宋供奉齊梁中正俱流傳  
胡爲終世僅布素江湖老大垂華顛呂生呂生勿復言  
才高自古多迍邐煌煌國匠抉天巧造物小兒寧汝憐  
不見先生坐詩癖百憂萬恨攢眉端荒丘姑婦兩奇絕  
橘中四叟吾忘年他時芒屨會挈汝一枰柯爛青霞天  
湯陰王翁年百八十矣而肌膚綽約若處子且

豪飲數斗不醒座間出諸名流贈章邀余繼

作

王仙翁髮如孤鶴顏如虹大腹便便貯河漢鯨吞鰲吸  
三千鍾龜紋蹙起隱胸後玉璜炯炯橫雙瞳眉毫耳毫  
燦霜雪時人不識呼社公步輕履坦疾于箭周行五岳  
攜孤筇自言今年百八十九朝舊事盤心胸高談弘正  
儼目睫信陽北地俱兒童大還曾受柱下老素書亦從  
河上公王母瑤池燕周穆仙源幾度桃花紅崑崙閭風

不肯住脫身混迹遊寰中  
竭來瓢笠武林道湖光山色  
聊從容飄然遇我雲水窟  
謫仙大叫呼人龍初平騎羊  
去不返子豈有意仍前蹤  
金盃玉壺亦咫尺翩翩奇骨  
尊凡庸感君意氣爲君歌  
參差兩腋乘長風却憶玉皇  
香案側丹臺恍惚曾相逢  
塵埃墮落經幾劫欲騎鯨背  
飛寒空大鵬希有儼相值  
遨遊八極追鴻蒙他時再赴  
易遷約仰天大笑扶桑東

少室山房集卷二十五

欽定四庫全書

集部

少室山房集卷三十一至

詳校官編修臣翟槐

侍讀臣孫球覆勘

總校官庶吉士臣何思鈞

校對官中書臣王鍾泰

謄錄監生臣卽颿

謄錄監生臣畢所誦



欽定四庫全書

少室山房集卷二十六

明 胡應麟 撰

七言古詩一十七首

李大將軍惟寅得唐吳生觀自在菩薩真蹟長  
裾跣足天男相一先世人稱謂之謬且莊嚴  
妙好六法具備非五代宋元諸名家所辦因  
手勒心經其上而屬余長歌識之

畫師崛起開元日萬象毫端鬼神泣前無顧陸曹衛張  
二李閻韓總非敵胸中六法參羣靈解衣盤礴流風霆  
斯須宇宙落指掌茫茫大塊愁憑陵曾畫玄元皇帝廟  
隱見人工奪天造杜陵老子筆扛鼎恣寫篇章豁懷抱  
金莖碧瓦扶雕梁旌旗晃散爭飄揚詞鋒繪事兩突兀  
恍揭日月懸宮牆裴旻將軍號大俠力懇丹青薦冥業  
干將起舞爛白虹倒擲寒空日星裂爾時逸氣橫鬚眉  
狂墨亂洒秋淋漓辟支羅刹儼飛動旁觀辟易驚神奇

吳生一去八百載後起何人  
劃真宰徒聞寫照推揚光  
未信登壇屬王靄脫壁庸庸  
孫夢卿五朝人物傳虛名  
宋元能事著山水開元遺蹟  
如晨星此幀大士最殊絕  
妙好莊嚴種種列珠璣瓔珞  
被四體咫尺天人共頽頽  
高堂十仞雲婆婆彷彿朱闌  
臨普陀俯窺渤澥僅涓滴  
青蓮一瓣揚洪波劫風萬古  
吹不動金身丈六天嵯峨  
大悲顯化遍五濁宰官帝釋  
隨呼呵有時幻相示閨閭  
世人眯目談娉娥卽今看畫  
豈待說幅巾長帶垂山阿

誰其摹勒事琬琰侯也功德真江河憶侯夙世住靈鷲  
金粟如來本身後閻浮一念偶下移暫寄貂蟬曳華綬  
將壇文苑雙張皇八荒九域傳琳瑯鷄林百金買隻字  
徃徃逸調追河梁生平寶此若垂棘樹下楊枝宛曾識  
焚香手篆般若經照耀叢林炯雙壁竭來示我令作歌  
欲噓甘露迴沉疴才枯思竭腕力弱仰天白眼空摩娑  
惟余與侯深肺腑意氣鏗鏘邁今古侯能射虎過裴旻  
余非雕龍愧杜甫吳生千載若有緣三生裴杜重周旋

安得再起斯人貌君虎頭燕頤相堂堂九尺玉立麒麟前  
他年雲臺烟閣第一書姓氏為君大揮十丈之如椽

易水壚頭放歌懷慶卿

君不見高漸離舉杯擊筑天淋漓君不見魯句踐叱咤  
干將起雷電十載荊卿遊酒人褐衣短後隨風塵一朝  
匕首刺秦國白虹千丈垂嶙峋貌貅萬億夾廣陞閭闔  
眈眈虎狼睨羸軀五尺掉臂入勇懾孟賁走慶忌世儒  
刺促計成敗胡不身履斯人地君不見十三殺人秦舞

陽死灰躑躅秦宮傍當時孺子果怯死捧圖胡以來咸  
陽乃知鼎鑊良可蹈一時感激輕毫芒豆羹箪食色陡  
變况持白刃遊朝堂天門戕戕九重闢六師七萃紛張  
皇從容步履若無事俯視政也如蜩蟬圖窮督亢刃迺  
見至今神貌猶揚揚偉哉大勇曠百世共工項籍爭  
雄強八創嬉笑總餘事沾沾俗士徒稱揚君不見聶政  
大呼本倉卒專諸進食元潛藏豫生毀形伏橋廁誰哉  
十目交崑廊三人視卿孰難易一死雖同蹈死異吁嗟

太史傳刺客百代何人奮高義我來易水吟悲風蕭蕭  
匹馬隨征鴻當時壯士豈復得黃金臺館徒穹窿為卿  
作歌酹卿酒恍忽精靈下攜手田光鞠傳渺何處獨往  
城南問屠狗

太史傳諸刺客其事惟荆卿至難子長摹  
寫亦極感發余累有辨折詳筆叢史叢等

書

醉中放歌五章

君不見北斗精天瓢湛露浮金莖君不見酒泉域甘  
醴灤灤地中出三漿沆瀣盈帝壺觴泛崑崙盡紅液

從知大造亦耽酒不樂人間復何有笑殺移封唐汝  
陽兩能令風伯狂西園公子號無忌一醉曹騰小  
天地

君不見放勳堯千鍾一飲常逍遙君不見重華舜百  
觚一舉受天命衿衣鼓琴二女果多壽多男祝神聖  
誰云至禹衰帝德旨酒千秋肇儀狄鄙哉巢父及許  
由一瓢不保箕山頭何似攜將貯醺醪蕩蕩巍巍九  
州牧



君不見秦祖龍布衣十日咸陽宮君不見漢高帝擊  
筑登臺望天際驅山鞭石魑魅走素媼雲中夜流涕  
威加四海卷六合匍匐平城命如葉不因大風沛上  
歌千秋胡顏較仲多博浪沙中副車碎底似平原決  
旬醉

君不見魯仲尼聖德巍巍穹壤齊君不見姬公旦赤  
舄忠勤古今擅有孚濡首繫易終惟汝無量不及亂  
嗚呼周孔兩大聖歡伯時時見親幸胡爲屈子遊江

潭獨醒反被蛟龍餐諒爲名士傳不朽但讀離騷飲美酒

君不見東王公金莖瓊醴延青童君不見西王姥高宴瑤池萬粧舞白雲在天丘陵出青雀翻飛報漢武列仙羣聖三百六笑揖天姝美如玉東方小兒下界遊蟠桃三熟仍三偷暫解貂裘換雲液我欲乘風上八極

後醉中放歌五章

君不見陳孟公席間壯氣噓長虹君不見孔文舉座上賓朋劇風雨金罍玉尊酒滿堂跋扈飛揚恣豪舉才疎志大差足惜投轄捷關政堪語人生倏忽同蜉蝣夜長晝短秉燭遊千秋飲者傳異代漢魏王侯竟誰在

君不見阮嗣宗竹林白眼天朦朧君不見陶元亮破帽東籬漉家釀五斗何如歸去來長嘯墟頭興逾王謝公雙屐嵇公琴明哲胡爲異霄壤步兵臧否吾所

師柴桑三徑嗟無資當時一官不自保百代聲華擅  
文藻

君不見張季鷹放浪江東稱步兵君不見晉吏部醉  
倒甕頭笑行路衣冠齷齪徒檻猿富貴斯須草頭露  
姦雄竊國中華亂日月何如醉中度鱸鄉亭下風颭  
颭高標想像垂千秋不因酣卧遭束縛後世何緣有  
畢卓

君不見太白翁鯨吞鰲吸三千鍾君不見少陵吏蟬

腹龜腸三百首狂歌痛飲差快意典盡春衣漫回首  
身後河山千載名生前宇宙一壺酒人生有錢付酒  
家十日五日傾流霞今辰何辰夕何夕試問耒陽興  
采石

君不見王長公彩毫萬古稱人龍君不見汪伯玉一醉  
顏唐倒千斛太常齋日不禁酒歲歲如泥三百六金華  
邂逅赤松子潦倒乾坤洞肝腹奔園澹園及太函悲風  
宿草俱茫然當時把臂誰上坐老泪河山夕陽墮

平原道中

無侶卧小舟獨為十日飲飲醉日為一短歌前後各五  
章荒唐謬悠間以詆滑禮法之士咸謂弗根典午林下  
諸賢顧躍然羣起和我聊復振而存之

長安僧舍邂逅莊山人靜父余初未之識也靜

父獨以意契邀余啜茗禪榻中脩然竟日垂  
別問姓名乃相顧大笑贈以此歌

黃金臺下莊靜父嘯弄雲烟天尺五烹葵拉我遠公社  
錯落芙蓉劍花吐經年作客咸陽東浩歌擊筑飛長虹  
貂裘敝盡歸不得五見黃葉號西風何日相將武夷去

桃花九曲流春紅丹青樓殿四百八醉謁上帝金銀宮  
晉陵夜泊寄懷張總戎黃刺史

君不見黃叔度曾次汪汪千頃波君不見張茂先襟懷  
朗朗百間屋萍蹤邂逅天東南把臂論心洞肝腹張公  
儼舍宗陽宮生平俠氣摩蒼穹高牙大纛屏一壑十年  
釣艇橫西風黃君卜築紫陽岫四壁圖書坐清晝雌雄  
二劍巧相值錯落寒光映袍袖一朝遇我肺肝親青天  
散髮成三人把盃白眼望晴昊寒冬大壑迴陽春圍爐

煖閣坐深夜彈碁覆局流星文形骸不將爾汝隔往往  
一諾懸千鈞邀我湖頭結新社春花秋月長為鄰何意  
風波起倉卒轉盼交游異南北脂車秣馬發中路把袂  
河梁壯夫泣青衫潦倒困一經俯首王門弄齊瑟平津  
相君差快意吐哺延賓近東壁客星帝座寧久眠夢入  
桐江釣鰲窟呂梁震澤天茫茫極目飛雲橫太行遙看  
親舍宅其下霜鬢雪鬚垂高堂功名富貴果何物經時  
乞米留長楊扁舟便作五湖客童孺十口歌滄浪黃河



濁浪浩無際支祁颺颺爭豪強大鯨如山奮鬚鬣參差一  
葉浮沙棠窮途歷盡抵淮南下維揚疾于箭却憶張  
黃兩故人宿昔河梁涕沾面男兒有身百不憂千秋大  
業寧公侯三孤九列亦餘事榮華倏忽同蜉蝣君不見  
張公英雄蓋一世烟閣雲臺了無繫忘却麒麟第一人  
獨往寒山問真諦君不見黃君意氣橫青霄一麾海上  
遊逍遙垂天大翼六月息中林往往嗤鷦鷯我今胡為  
尚泥滓布襪青鞋共吾子四百八十金銀臺割據湖山

誓從此

聞清源王孝廉得第將歸戲為短歌寄訊

王郎再謁甘泉殿一日聲名滿畿甸中天百尺黃金臺  
走馬看花亦堪羨清源柳色紫啼鵑紅粧十萬嬌明霞  
若箇新知莫愁女獨倚高樓望宋家

燕中日聞文仲使君手書寄余不達而返短歌  
訊之

憶昔仙鳬下東國種露栽雲遍城邑至尊召見明光宮

上考吳公書第一含香郎署五載餘大府却擁專城居  
黃堂赫赫五馬貴翻令尺素來樵漁宛轉雙魚澱江畔  
為復浮沉付殷羨美人如花若耶岸遲我同開越王殿

蟠桃歌為大學士趙公賦

君不見大羅之天天盡頭峨峨五城十二樓金銀臺殿  
四百八瑤池阿母乘蒼虬上有蟠桃枝下拂崑崙丘托  
根層城頂倒影弱水流一花三千春一實三千秋一花  
一實遞開落滄桑億萬增牙籌成周穆滿慕長世飛黃

騶驢憑空遊西華設燕坐樹下欲噉此果不敢求元封  
武帝候青鳥行厨玉女羅天球貪心欲植上林苑詎知  
人代同蜉蝣東方本是謫仙子三熟三偷混塵滓巨靈  
一見呼兒曹函谷於今氣長紫池頭又閱三千年幾看  
渤澥成桑田玉桃偷得不自飽却來東閣登華筵玳瑁  
筵開近平樂南斗為樽北斗杓中使傳觴太液亭大官  
行饌甘泉幙五陵冠蓋何網緼八荒一氣旋洪鈞三年  
三月十三日河清海宴飛祥雲老人星見紫微側百辟

趨鏘酬相君相君世胄本清獻琴鶴風流誰不羨焚香  
告天天下聽炯炯靈臺絕欺謾龍頭晚達升長楊要將  
隻手扶綱常觸喉時宰甘播棄一麾南海趨衡陽采藥  
羅浮巔折梅庾嶺旁朱門鑿竊窬勾漏捫丹方拂衣却  
返巖子瀨六洞三山迥相待背城十里金臺失買斷寒  
崖碧霄外嵯峨絕壑懸飛龍白雲紫霞湧雪同流泉百  
尺清見底噴珠漱玉聲玲瓏灼然靈境果奇絕彷彿藏  
書神禹穴初平騎羊當晝過大士雙林詒禪悅東山一

寧寧久局應圖處處懸丹青南陽抱膝卧豈得玄纁束  
帛來緇駟乾綱再振寰宇闢左列夔龍右垂益一朝百  
揆司鹽梅萬姓歡呼荷天力和衷協德居承明正笏垂  
紳臨大廷帝心默感九重上劃然天地迴清寧維時西  
夏變倉卒奮臂亮渠一呼集包藏禍心結狂狡當寧皇  
皇食為是東方島夷彌陸梁篡竊故主圖開疆玉京一  
鼓平壤破搃胸車轍矜螳螂中原旱魃播灾禍十家九  
家望門餓三方大難叢一時姦豪所在盤蛟螭誰其帷

幄運奇策太阿白日飛丹墀天威咫尺強敵下汎掃妖  
氛出寧夏兩宮賑給十郡全民忘旱魃爲豐年總戎經  
畧度鴨綠敵騎倉皇軍盡覆朝鮮故主仍復都稽顙西  
飛乞臣伏區區鹿麋左右王糾集萬衆窺遼陽王師一  
出盡瓦解橐駝千隊俱奔藏南北東西盡安輯偉哉相  
業不世出驅除咸謂參等勞發縱伊誰匪相國宮府一  
體忘喧囂皇儲出閣安勤勞一人元良萬邦肅功百房  
杜追夢陶俯仰天心念良弼五福煌煌厥躬集越裳翡

翠日夜輸肅慎波臣到重譯卽今壽域開明堂桑弧蓬矢羅圭璋十方翹首望霄漢含哺鼓腹歌陶唐天子傳宣下丹闕尚方親賜渾羊設金錢粲爛內府儲品饌珍羞路填咽維時春暮百卉榮梅李杏柰俱生成牡丹今歲尤蚤發燈如雲錦披仙城獨有蟠桃隔瀛海玄圃蓬丘斷樵採乍宵東走過吉雲偷得持觴獻真宰真宰年才七十強豐頤廣顙形貌康四聰四目明且達儼如威鳳遊岩廊孫枝遠膝百千指蘭玉盈庭照羅綺面前羅



拜但點頭樂事世間誰更比願公酌我酒聽我蟠桃歌  
不爲萬間厦奈彼寒士何聽我蟠桃歌願公酌我酒大  
庇寒士顏還須棟梁手蟠桃歌莫浪嗟願公歲歲傾流  
霞姜公八十造王室衛公九十勤王家阿衡百歲佐商  
運雲臺烟閣傳無涯

少室山房集卷二十六

欽定四庫全書

少室山房集卷二十七

明 胡應麟 撰

七言古詩一十一首

金壇鄧孺孝以易詮見寄賦答時舟過京口

垂髫夢入華陽洞耳割垂龍興飛動茅家兄弟騎赤虬  
握手胡生喚珍重金壇壇上鄧伯羔謫籍何年離大茅  
三山長嘯俯六合濯足瀛海霜空高點易研朱閉蓬戶

塵世浮榮瞥朝露韋編幾絕不肯休恍惚義文案頭晤  
成書寄我十萬言言言盡挾參同詮丹霄擇日待冲舉  
何物黃金稱大還還山高拄九節杖一見初成訝神王  
傳語山中白衣相屈指相逢大羅上

洛陽春色圖題陳道復水墨牡丹

乃黎惟敬出  
都日持贈者

二百年來畫花卉吳中沈周稱第一頡頏並數陳生淳  
不事丹青祇水墨天機一派掌上流盡掃鉛華露風骨  
家雞曩昔厭餘子邇歲聲名陡籍籍吾家此卷尤絕奇

不向長安市中得南海黎君夙遺我把袂河梁示親暱  
牙籤錦軸題八分四字猶存故人迹憶生袒裸盤礴時  
頤指羣工若隸役中山大管操如椽半醉掀髯見真率  
桑皮丈八橫高堂元氣茫茫墮几席姚黃魏紫信手拈  
瞥眼千花萬花出須臾四座迴春風嬌李穠桃總辟易  
青油翠幙張層階十二雕闌護傾國天然富貴壓塵土  
底事珊瑚鬪玉石盤行瑪瑙夜色殷屏敞琉璃曙光濕  
瓊樓特起明朱霞玉佩低垂映紅日女英嬌內偕娥皇

飛燕昭陽倚合德廊開響屨西子遊亭俯沉香阿環立  
霏烟綰霧態不禁握雨攜雲狀難悉枯枝斷幹若草草  
嫩蕊繁英轉奕奕芳菲恍度洛水頭爛漫如樓上林側  
咄嗟陳生何太奇十指參差幻帝力含毫肯避造物嗔  
落楮翻令化工泣經時顧凱筆欲飛曠代徐熙品推逸  
趙昌形似真兒曹黃監精工詎倫匹爲拈老句題冊終  
跋扈飛揚迥相敵連城十五差足償美錦三千復何惜  
卧觀旬月仍卷還笑殺明誠錄金石

丹圖以直重卷還  
趙明誠得徐熙壯

丹

于生歌贈鳳鳴

齊東于生太奇絕草就征西纔十八萬言落筆風雨驚  
白眼青天對明滅憶生年少歌遠遊興到扁舟夜中發  
嬌妻稚女了不顧一葦蒼茫汎吳越會稽秦望攀嶠嶢  
迴首山陰正飛雪四百八十金銀宮湖上烟波若塗抹  
移舟却向姑蘇臺揚子濤聲暮填咽石城城南訪莫愁  
畫棟雕甍管絃列平康巷陌人如花散盡黃金等塵屑

萬金散盡歸故鄉  
斑斕菽水娛高堂  
三冬文史業頗富  
駢駟駉駉爭騰驤  
一經恥逐蠹魚老  
摩挲石鼓臨鍾王  
解衣盤礴得畫理  
朱欄頽洞浮瀟湘  
禽魚小景各生動  
飛鳴宿食交林塘  
明窻淨几拂縑素  
虎丘細酌焚清香  
名流滿座揮大白  
百觚一飲雄高陽  
酣來如意舞精鐵  
雙龍錯落迴精光  
一朝遇我莊岳底  
飄然挾刺來茅堂  
念年魂夢走澱水  
龍門渺邈如天閭  
先生牙頰肯終惠  
焦螭努力追飛黃  
嗟余落拙且塞江  
淮一旅徒披猖



中原屈指故老盡卽令二仲誰求羊邂逅逢生竹林下  
有如阮籍偕嵇康淋漓麴蘖豈無意仰天大笑神飛揚  
男兒事業在十指述功紀德皆文章高冠大蓋等澌沫  
電光石火徒張皇生今二十甫逾八聲華燼燼懸鄉邦  
歌處呻吟總金石賦成咳唾俱琳琅山東英妙孰卿比  
長纓直欲蒐窮荒他時掉臂走雙闕天人三策攄岩廊  
名成彈指竟大業肯將肉食移青緗春風昨夜變楊柳  
娟娟別思盈河梁念子殷勤若膠漆紛披大雪攜壺漿

男兒抗手詎足論新秋計日來餘皇芒鞋布襪吾共爾  
翩翩結束窮齊方雲霞萬仞躡梁父七十二帝驂翺翔  
磨崖絕頂勒名姓卧看海日生扶桑

讀漢壽亭侯廟志歌有序

關忠義侯廟祀遍海內獨履歷自陳壽本傳外  
槩亡足徵壽書體存簡質賴裴注贍縟差足證  
明而是傳參伍殊寡迨勝國明初雜劇傳奇與  
市井之演義出而忠義生平事迹混淆極矣左

轄蒲州趙公產侯同里因據元人所修漢壽亭  
侯志詳加訂覈擴為茲編余諷誦興懷輒綴長  
歌卷末百世而下得亡以為知言也

芒碭天開九州牧白水興符赤伏炎精四百運數終  
海寓瓜分魏吳蜀巍巍忠義起解良精忠大義扶三光  
南權北操兩巨猾侯也睥睨如蜩蟬憶破袁軍訪昭烈  
十萬貔貅俱膽裂飛身立取上將頭擲向曹瞞血猶熱  
荊州坐鎮推元戎恢圖漢室除姦雄舉襄圍樊勢破竹

七軍電掃如秋蓬禁俘德泉兩雉兔大澤艤舫莽迴互  
天崩地坼華夏驕六合幾完漢時故自許以南遙受盟  
壺漿箪食侯湯征笑殺曹瞞挾漢帝中原無穴逃長鯨  
苦恨東吳衆蝨賊割據河山騁詐力陰謀秘計日夜萌  
舉國昏昏效鬼蜮賊蒙詭避遜嗣興甘言密餌藏戈兵  
侯也胸懷豁雲夢那知故穴潛分崩樊圍不沒僅三版  
赤手荊州竟徒返麥城困守臨沮悲今古英雄遞扼腕  
侯亡逾月蒙亦亡流芳遺臭垂青緇漢統興衰實侯繫

蒙身百斬寧堪償權本狼貪遜狐媚凶德於時偶參會皇  
天有意灰炎精詎曰羣姦志能遂玉泉之山紫氣屯侯今  
世世為明神童孩走卒競瞻拜萬年廟食昭君臣皇皇左  
伯亦蒲產異代同心帝猷展執鞭想像迴英風欲起侯躬  
訴悽惋九原不作空踟躕拮据往事垂璫璵青絢觸目覩  
顏面侯也恍惚來前除雲旗飄空互明滅鐵馬金戈儼騰  
踏紛紛成敗論後人矇瞽何由覩雙睫東陽腐儒史筆流  
褒誅隻字嚴陽秋為侯作歌侯俯讀掀髯一笑諸吳牛

逍遙篇爲袁履善八秩賦有序

袁丈履善行年政八十矣而色若孺子且步履矯輕筋骨强悍神明之用老而逾王至玄譚眇論儼叩巨鐘河懸海翻疊疊不竭飲酒奕棋賦詩染翰決辰傾宵即壯夫未易追也是秋聞余匏繫湖上挈舟千里屬賦長歌爲壽昔盧照隣抱疾幽憂一旦遇孫思邈慨然作賦以自況迺余年垂半百齒髮變衰而袁

丈夫霞舉軒軒冷然天際今之所遇得已猶  
昔乎夫上古有大椿者八十歲以為春秋而  
袁丈年甫八十夫莊生之旨此特其兆端耳  
因稍次其歷履為逍遙之篇

國初詞人袁海叟白燕篇章膾人口風流文藻二百年  
載觀當今沔陽守沔陽刺史真人豪弱冠雄心蟠巨鰲  
射策曾同弇州榜三山彩筆飛寒濤白纒青衫走燕市  
杜曲東風綰游騎黃金臺館千尺強盤手筑狂歌五侯避

長楊執戟甘沉寔一麾出守辭神京朱旛皂蓋列先後  
峨岻大舳浮江城江城八月天茫茫九疑七澤連高唐  
岳陽樓頭喚杜甫乾坤萬古留詩狂吏事紛紜苦拘束  
迴首家林夢松菊拜迎官長折腰領鞭撻黔黎碎肝腹  
文人拙宦自古然丈夫詎乞兒曹憐區區五斗若毛髮  
肯將一飽酬如椽步兵江東興飛越兩腋秋光路明滅  
爲園半割三泖雲築室全邀九峯月九峯三泖長逍遙  
飄然越海來輕橈金銀梵宇四百八烟霞石屋攀崒嶢



疇昔逢余大堤上拂拭楸枰互神王持杯恍締竹林友  
醉眼朦朧豁霄壤四腮鱸熟歸興濃河梁對拆雙飛龍  
重來握手瓦棺寺燭花夜半流殘紅聞道今年政八十  
步履康莊捷蚊翼家家拂席延林宗處處攜觴候安石  
嗟余落魄雅好游夙生藥物攢眉頭看君耄耄若孺子  
香山洛社同優游玳瑁筵開虎丘畔矍鑠廉頗老能飯  
芝蘭玉樹森庭階舞綵含飴劇堪羨何來初度地藏符  
孟秋晦日懸桑弧今年七月月小盡安期一夜來蓬壺

太白浮公爲公壽塵世浮華孰先後靈光一柱海岱間  
屈指君王問耆舊冥靈瑣瑣未足誇瑤池幾見飛桃花  
春秋載閔大椿厯青牛相逐還流沙

布帆行寄徐使君有序

先是惟得使君以青雀見假自淮達燕至是  
晤余彭城復輟所御艨艟載我十口兩入帝  
都行人亡恙秋毫使君力也爰賦長歌屬之  
榜柁凡八百八十言

吾家大羅上絕頂增城樓醒逐東方生竊桃瀛海頭置  
風起八極吹墮蒼精虬支機隔銀漢織女忘牽牛男兒  
意氣凌千秋如椽十丈輕王侯蘭陵美酒三萬斛百觚  
一飲眠糟丘吳娃越童兩綽約粧成累月彈箜篌參差  
狂態發中座不告妻子乘扁舟山陰夜半六花綻雪片  
紛紛墮高岬戴家傭夫喚不應載得西施若耶畔五湖  
汎宅天茫茫九疑合沓連高唐巫娥握手呼宋玉朝雲  
暮雨啼英皇北望宸居建章起西笑長安興難已大江

東下飛寒濤南顧洪河疾流矢亂山芒碭尋真龍咄咄  
新豐亭長公甘言鼎鑊紿父老彎弧反躬如逢蒙穀城  
酹留侯緬懷遊赤松胡顏教隆準背約追重瞳侵尋楚  
事去垓下貪天功時無軒轅帝監子皆英雄迺知疇昔  
廣武嘆步兵衡鑑懸秋空丈夫白眼甘慟哭忍將涸轍  
行途窮彭城困阨古來有躑躅徐卿望余久尊前片諾  
肝胆傾苦憶忘年竹林友樓船一借張孝廉勃窣猶堪  
事奔走齊滕魯衛遵遺墟極目黃河薊門柳塞驢蹏蹏

窺蓬萊華陽碣石俱塵霾道傍叱咤魯句踐白虹怒吼  
昭王臺左掣雕龍右屠狗乾坤嘒喈雙青鞋俗流驚怪  
頗欲殺先生玩弄如庸孩故園松菊渺何處拂衣長嘯  
吟歸來親舍夷猶太行麓抱膝躬耕事樵牧長鑱谷口  
時逍遙點綴魚蝦伴麋鹿石羊成隊閑金華丹崖翠壁  
流胡麻支機却訪鵲橋畔尋源直駕崑崙槎長洲宮闕  
閑荒苑潮打空城秣陵晚壚頭誰問太白星六代殘碑  
弔蒼蘚夕陽竚桃葉雙槳沿前溪莫愁盧家婦邀我長

干西臨春結綺蔓狐兔白門木黍空高低笑殺當時景  
陽井三人貫索如連雞爪步旌旗迴迴合燈火邳溝互  
明滅珠簾十里歌吹濃一派簫聲廣陵月青樓宿紫薇  
繡幕圍羅衣征夫念長路明發臨淮圻使君彈指詫歷  
歲大纛高牙坐相慰布帆不厭長康癡安穩行人出徐  
沛嗟余畏路頻遠遊羨汝急流真勇退挂冠神武殊匆  
匆黯淡鄉心入鱸膾斫鱸膾勻秋霜張錦席浮滄浪大  
姑迂客來南康小姑送客過潯陽武昌黃鶴爲君下閤

千百尺摩青蒼買得秦人避秦地夾堤紅樹迴漁郎拂  
衣偃息武陵洞白雲如絮紫軒窻人生俯仰貴適意築  
宮冲漠朝羲皇危亭四顧象緯列九玄瓊笈羅縹緲噫  
吁使君卧豈得綠野平泉漫營室蒼生四海唇嗷嗷翹  
首經綸帝三錫司空治水颺颺愁太尉登壇鬼神泣降  
生名世詎偶然突兀麒麟候顏色廟堂計日詎雄圖掃  
除日本平海隅天吳竄迹海若徙雞林重譯來長途勲  
庸奕奕樹彝鼎飄然一葦還菰蘆三千行圓八百就刀

圭入口升蓬壺此際胡生滿謫籍香案仍居玉皇側大  
鵬希有行相逢浩蕩扶搖騁八翼營營下土同蜉蝣天  
上寧知總舊識蟠桃盡摘玄圃霞爛漫瑤池醉十日

寄俞聲父廣文俞君六十而意氣壯甚投余萬  
言之書愧無以報報以短歌

俞翁六十形貌蒼胷中壯氣何昂藏唾壺擊碎鐵如意  
獨夜悲歌神慷慨素書雙鯉乍遺我剖之字字皆琳琅  
豐城雙劍久埋獄誰從石匣提干將載讀名山兩游記



雄詞直上追班揚琴聲四壁響空翠雲霞萬疊流青絢  
興來便欲遠尋汝青鞋布襪雙翱翔叢霄絕頂跨鵬背側  
身南斗呼瓊漿晨風不假子安便滕王高閣天蒼茫珠  
簾畫棟永寂寞何人百代垂文章參差念汝袖中刺片  
帆計日來潯陽琵琶亭下過商婦荻花楓葉吟秋江洞  
天攜手三十六醉鞭亂石成羣羊王門鼓瑟讓兒輩沾  
沾白雪彈清霜誰云燭武非少日即今聖主開明堂魏  
尚雲中阮羣吏樓船十丈橫扶桑一朝談笑生羽翼至

尊投袂呼馮唐君不見公孫片言合武帝千秋爵位高

明光

余君寄余  
雜文甚夥

度遼行再送萬中丞

山西萬侯真丈夫豪名七世聞匈奴虎頭燕頤鐵作膚  
弱齡猛氣吞於菟擔簦挾策遊天都赤手欲把蒼生扶  
九重含笑留操觚一麾重鎮分銅符念年大白揮醪酥  
雄心日夜馳伊吾漁陽鼙鼓動地呼至尊輟飯思良謨  
倉皇頗牧勤朝晡璽書十道飛平盧紫貂三錫來屠蘇

清酒黃封傳玉壺酒酣耳熱聲嗚嗚擲盃慷慨登長途  
貌貅十萬聽援袍鵝鵲三千隨渡瀘八百家丁操僕姑  
甲光耀日天模糊朝鮮簞食歌來蘇王京一掃空萑苻  
樓船鴨綠江平鋪長驅海若縻侏儒釜山對馬風摧枯  
西飛清政魂先祖六十六島追逃逋行長骨碎行頭顱  
生擒關白如螻蛄金人夾道陳休屠至尊前殿臨賜鋪  
子孫奕奕封金吾河山帶礪名公孤一編黃石垂孫吳  
山西萬侯真丈夫

昌世孝廉有子記誦絕人十二遊泮傾動儕輩  
爲作阿咸行

阿咸七歲工臨池眼如點漆膚凝脂九齡大書掃秋葉  
墨花往往堆漣漪十二青衫走黌校十五胸腹蟠珠璣  
千言一揮河漢溢萬卷一目風雲馳矯若金莖摧雲際  
亭亭百尺無傍枝君不見楊收十三擅文藻乞言盡日  
窺藩籬男兒墮地山岳動豈與氓庶同蚩蚩又不見子  
安十四序滕閣落霞秋水標神竒低昂造化在掌握寸

管立洩玄元機區區富貴果何物百代聲華迥難匹古  
今名士多少成大業終須汝曹立况復而翁字彥國載  
世文光炯奎壁他時稅駕詎可量汗漫扶搖待風翼嗟  
余潦倒病且愁倏忽流年近高適王家玉樹空寤寐一  
子呱呱尚襁席蒼茫覩汝思欲飛那得寧馨在蓬華後  
生可畏亦可虞電火人身詎金石少時我亦王楊徒此  
際何由髮重黑含毫爲汝聊作歌努力韶光莫虛擲

繁弱行王世叔通侯園中觀射作

王侯腰懸鐵衲襠雕弧手挽五石強竦身注目捷風電  
左射右射迥莫當大旆高牙矗雲際戈鋌甲冑紛飄揚  
觀者如山盡辟易九兕却走千夫僵巖呼谷應地洶湧  
砂奔礫舞天蒼茫義和慘沮白日匿飛星十道流扶桑  
一發旄頭落再發連雙鶴三發定天山築城連受降連  
珠四五六七八紛相將九發九日墜百發百穿楊巧若  
甘蠅教飛衛勇如養叔攜潘阡雀兒隻目詎足擬牛心  
片截差堪嘗丈夫夙昔四方志桑弧蓬矢懸高堂登壇

仗鉞挂金印英風八面馳戎羌稜稜霜氣轆羽箭秋空  
俊鶻爭翺翔吁嗟君侯絕技有如此歷數古來名將疇  
能雙憶昔文成挽宗社元勲茂烈標旂常河山帶礪國  
同永丹書奕葉傳貂璫侯也登朝在髫髻朱顏綠髮驕  
琳瑯晝攝衣冠扈鑾輅夜鳴刁斗驅龍驤臨淮座上脩  
相值軒軒霞舉明朝陽驂騶駟詎凡骨聲華藉甚蜚  
天閭帝謂河漕實司命九重特詔來淮陽艤舫巨艦載  
芻粟旌旄絡繹浮長江黃流徐沛忽中斷一麾立度千

餘皇干城獨坐鎮寰宇巍巍天塹雄金湯八年貢篚輸  
上國天子設燕開明堂安危華夏賴公等張公神物真  
干將寶弓玉櫛帝三錫雅稱大白呈中黃太平無事罷  
征戰綠蕪生戟沓沉槍酒酣耳熱壯心發唾壺擊碎敵  
胡床矢鋒貫虱總浮誕弓弦落鳥徒誇張縱觀侯射果  
殊絕飲羽穿札誰低昂吁嗟侯技詎止此弱齡海內傳  
篇章詞鋒筆陣兩揮霍將壇文苑俱輝煌即今侯年但  
強仕威稜烺烺傳遐荒他時累葉事明聖二十四考追



汾陽麒麟第一鎬姓氏萬年繁弱流芬芳

南都留贈穀元厚之并寄別文明王呂靜父長

方至卿燕孺七子

君不見燕昭王高車大帛招賢良黃金臺館矗天際樂  
生棹臂來華陽又不見漸離子白眼酣歌競睚眦囊無  
擔石那復論手拉荆卿誓生死豪華極目俱荒丘蕭蕭  
易水長東流何人築宮館材傑何人擊筑追名流先生  
獲落滄海上蒙茸七尺披羊裘虹霓為竿月為餌六鰲

夜掣珊瑚鉤，殄霞嬾逐赤松卧。馭風屢學青蓮遊，長鯨  
鱗鬣差快意。揮斥八極同浮漚，狂來拍手驚帝座。失足  
偶墮天南頭，天南臺殿四百八。金銀觀闕連神州，一遊  
一月不知返。勝槩欲盡仍淹留，浮槎遡溟渤。泊宅凌滄  
洲，名娃擁駿騎。調笑輕王侯，遙遙去揚越。望望來燕幽  
長安富兒不解事，如山酒肉供俳優。長裾不曳朝貴第，  
却來易水聊優游。翩翩二仲巧相值，片言頓覺平生投。  
雄心總向劇孟吐，俠節肯使朱家羞。名園與塏背北郭，

梁爛珠簾護油幕軒窗屈曲紫莓苔戶牖周遭藝蘭若  
爐烟澹宕逐揮洒茗椀清泠恣斟酌綠尊翠杓春茫茫  
指點明星月西落青絲挈盒游南郊王蔡追隨恣歡謔  
紫髯靜父雅好文風雅塲中主畫諾蹇驢夜入長安城  
一梁徐卿手重握徐卿意氣天下無蚤排閭闔嬉皇都  
鐵冠豸繡等長物玩世暫逐金門徒陳生元方美冠玉  
雕蟲刻鵞鵠酬操觚倉皇七貴招不得為我日寫秋山圖  
錢塘散僧尚留髮孤山舊社追林逋灤州黃生年最少

擔簦共入黃公壚一時衣袂把羣彥仰天被髮歌嗚嗚  
起舞那知夕陽落飛談直過行雲徂呼盧覆局興逾銳  
淋漓身世隨屠沽更長漏永列紅燭十千醪醴窮清壺  
人事紛紜百憂集哀樂相乘豈終極別離忽動陽關愁  
柳色青青遍畿邑丈夫恥學兒女顏萬里比隣叶金石  
吁嗟兩生良好仇爲我分攜泪沾臆君不見昭王臺館  
屹天際衰草寒烟幕荒垓豈若胡生五畝宮鄴苑梁臺  
邁明世又不見漸離擊筑徒悲號匣中一擲空鉛刀豈

若乃生把柔翰崢嶸礫石攀吾曹卽今塵霾暗四野吾  
曹豈是蠅營者卧龍管樂疇賢愚屠狗荆高並瀟灑大  
河冰漸竹箭流燕姬送客臨高樓驪駒唱徹渭城畔悲  
風萬壑晨颼颼人生會晤邈河漢功名何物真蜉蝣作  
歌鄭重別二子為我歷訊諸同遊

時兩生送余舟中  
中旦解維迺別

少室山房集卷二十七